

# NIWAKATE FILEMOM

Paulo jegepaa yaxawa Filemom me nakato Goniotagodi. (Awiniteloco v19). Filemom ligeladi manitaga nigotaga Colossos, one goneleegiwa liico. Nigica ligeladi one nelegi, odaa loiigi Goniotagodi jigidiaagi me yatecogotibece. (Awiniteloco v2). Filemom onijo ica liotagi ane liboonagadi Onésimo ane iale. Pida nigidiaagidi Paulo ja dakapetege Onésimo, odaa ja yaxawa meo meliodi me nakato Goniotagodi. (Awiniteloco Colossenses 4.9). Odaa nigidiaagidi Paulo ja iige Onésimo mopitacicogi ligeladi Filemom, odaa idí nagadi liwakatetigi Filemom me dipokota me dibatege Onésimo me daga leeditibige me iloikatidi.

## Paulo yecoaditibige Filemom

<sup>1</sup>Ee Paulo, ite ee niwilogonagaxi leegodi me jitece Jesus Cristo. Ee iniaa gonioxa Timóteo jiwakateenagatibigagaji nagadi notaganagaxi, akamagakaami, Filemom ane akaami godokaagedi me jibaaga, godokaagedi godemaanigi. <sup>2</sup>Aagaga jidikotibige loiigi Goniotagodi ane dinatecogoteetibece digoida gadigeladi, codaa me jidikotibige goniwaalo Áfia, iniaa Arquipo ane godokaagedi nigina me jakapagatege ane beyagitedogodomi.

<sup>3</sup>Jemaanaga Aneotedogoji ane Godiodi, iniaa Goniotagodi Jesus Cristo me dagaxa meletagadomitiwaji, codaa meote gadaalegenali mele.

## Paulo yalagata Filemom anodaagee meyiwagadi Aneotedogoji codaa me yemaa nioxoadipi, nigijo anodiatece Goniotagodi Jesus

<sup>4</sup>Nigina me jotaganege Aneotedogoji, idioka limedi me idalagatibigagaji Filemom, odaa iniotagodetalo Iniotagodi Aneotedogoji. <sup>5</sup>Igaataga jajipa moyalagatagawa me dagaxa manakatoni Goniotagodi Jesus, codaa me jajipatibece meliodi memaani ijotawece nigijo Aneotedogoji ane iolatedice me nebi. <sup>6</sup>Oko dinokaagetedi, codaa jaxawanaga oninicebeci leegodi okotawece jinakatonaga Goniotagodi. Enice jipokotalo Aneotedogoji meote me dagaxa mowoogoti niginoa anicina anele ane najigotedogowa leegodi me godexogotege Jesus Cristo, leegodi maxawanieledi oko. <sup>7</sup>Inioxa, leegodi meliodi memaani ganioxoadipi, jagawii me dagaxa me idinitibeci codaa meliodi me adoniciwagati, igaataga ajicitioigi laalegena ijotawece nigijo loiigi Aneotedogoji ane iolatedicoace me nepilidi.

**Paulo dipokota Filemom mele me dibatege Onésimo**

<sup>8</sup>Leegodi me micataga daga ee ganioxoa, codaa me leegodi me godexogotege Jesus Cristo ane najigotediwa inagatetigi, ani yaalegena me gadiigeni mawii nigica ane domaga leeditibige mawii. <sup>9</sup>Pida leegodi me jemaanaga oninitcebici eledi oko, ee ajemaa me gadiigeni, pida jemaa me jipokotagawa leegodi Onésimo, idaagida ee Paulo baanaga ee laxokegi, codaa me idejo niwilogonagaxi leegodi me jitece Cristo. <sup>10</sup>Enice, leegodi memaani iditawece loiigi Aneotedogoji, jipokotagawa mele mabaatege Onésimo. Onésimo micataga daga ionigi, igaataga maleeginaagejo niwilogonagaxi jaxawa me nakato Goniotagodi, odaa ja micataga degee eliodi. <sup>11</sup>Nigijo jotigide, agica niwalóttagadomitiwaji, pida natigide jigida niwalóttagadomi codaa me ee. (Odaa nigida liboonagadi Onésimo diitigi me dagaxa me diniwaloe.)

<sup>12</sup>Jiige Onésimo mopitacicogi makaamita. Eliodi me jemaa liciagi me idinemaa. <sup>13</sup>Domaga jemaa me inolitini digoina meetaga me idaxawa me waxodi gamede maleeginaagejo niwilogonagaxi leegodi mejitece nibodicetedi anele ane yalagatece Cristo. <sup>14</sup>Pida adomaga jemaa me inoiigiwa me daga idinilakidetagagi. Ajemaa me gadiedegeni me adaxawani, pida jemaa me adaxawani idokida nige akamagemaani.

<sup>15</sup>Ica ina Aneotedogoji daga ika Onésimo me gadalatawaanigi me akatitace mabaatege me opitacagawa midiaagi nigepaa anigicatibige. <sup>16</sup>Igaataga natigide agaleegidokida me niotagi, pida catedi me liciagi niotagi, ganioxoa dagaxa me godemaanigi, leegodi me yexogotege Goniotagodi. Eliodi me jemaa, pida emaan catedi anejigota me jemaa. Diganagawini emaan agidokida me gaotagi anele, pida micataga daga ganioxoa, ane yexogotege Goniotagodi.

<sup>17</sup>Enice nigakati me ee gadokaagedi, me jaxawanaga oninitcebici, abaatege Onésimo anodaagee mabaatigi. <sup>18</sup>Nigeo me aniatitema ganinyeelo, ogoa domige gadinaaleweeni, anikanitici emaga gadediani. <sup>19</sup>Ee Paulo jidikotibigagaji me jedia okanicodaagica naalewe. Pida jemaa manalakitibige me micataga daga adinaaleweeni, leegodi ee gadaxawani manakatoni Goniotagodi, odaa jigidaagee naga gadewikitace. <sup>20</sup>Enice, inioxoa, awii nigijo ane jipokotagawa leegodi Goniotagodi, odaa adoniciwagati, ane ee ganioxoa leegodi me godexogotege Goniotagodi.

<sup>21</sup>Malee jidi nagadi iwakate notaganagaxi, gadinakatoni mawii ane jipokotagawa, codaa mawii catedi nigijo ane jipokotagawa. <sup>22</sup>Pida eledi ane jipokotagawa. Awii iomagatitice imedi minitaga gadigeladi, igaataga inibeotege Aneotedogoji meote anipokitalo, odaa etidikatice, odaa jakadi mejigo makaamitaga.

<sup>23</sup>Epafras, anini niwilogonagaxi meetaga leegodi me diotece Jesus Cristo, yecoaditibigagaji. <sup>24</sup>Codaa oyecoaditibige yokaagetedipi me jiba, Marcos, Aristarco, Demas iniaa Lucas.

<sup>25</sup>Jemaa Goniotagodi Jesus Cristo me dagaxa meletedagadomitiwaji.